

四庫全書

集部

欽定四庫全書

集部

石倉歷代詩選卷三百

今九至
九十二

詳校官編修

臣謝振定

侍讀臣孫球覆勘

總校官進士臣朱 鈐

校對官檢討臣季學錦

謄錄監生臣陸紹臺

欽定四庫全書

石倉歷代詩選卷三百八十九

明 曹學佺 編

明詩次集二十三

徐溥

桃花衆禽爲林教諭題

碧桃在天上
緋桃巖谷中
巖谷深且僻
天天自春風
乃知造化恩
一一皆至公
衆鳥且有託
飛集在林叢
虞羅

既無恙飲啄聊可充人生亦如斯出處當時雍苟或失
其所寧不感吾衷

子陵釣魚圖

羊裘足自蔽奚以玄纁為富貴重五鼎輕若一釣絲假
令棄名節憑誰戒澆漓客星九天表獨有太史知一片
桐江石萬古無推移

退樂堂為貴州高指揮題

將軍富韜畧百戰功已成及茲桑榆景退步怡高情投

壺白日永散帙涼風清回首陣雲下鐵騎紛縱橫偃武
正今日鏡歌歌太平

一愚卷

人皆趨敏慧世路方紛紜勞形已堪惜况復斲其真百
為亦徒爾一愚良足珍默默鄙羶夸蚩蚩同衆民心君
苟無累萬物皆陽春所以顏氏子陋巷能安貧予方厭
機巧何年歸卜隣

愚樂庵為傅編修乃尊題

惟愚心自樂巧詐徒自勞居然山澤間遠謝世俗交鳴
琴既無譜酌酒亦用匏冲襟付寥廓萬事無復滄白駒
在空谷冥鴻逸青霄再歌愚樂詩令人思有巢

題郊城二蘓墓為眉山吳方伯重修賦

悠悠郊城隅繚繞惟長路路傍土巍然云是兩蘓墓兩
蘓生眉山崛起真寡助才高衆口讒屢斥同黨錮流落
天之涯氣節窮益固何況友愛情死葬亦相顧惜哉今
何存宿草但零露上頽登樵牧旁穿走狐兔行人每經

過感歎復悲慕到今五百年起廢良有數一朝為鳩工
周垣遶重戶種樹鬱青蔥風雨泣昏暮依然彭城時飄
泊似前度方伯今名臣好義夙所負惓惓仰止心豈為
鄉黨故陽羨有田園曾枉長公步我生不及從夢寐若
平素高墳無由謁拙句聊自賦

送僧歸杭州

超然簷蔔堂瞰彼下天竺形勝良足誇高僧瑩如玉飛
錫來京華捧檄言旋速歸將率緇汎丕釐昕夕祝翻經

飛雨花傳燈續膏馥細和道林詩白日坐巖谷

題秋塘野鷺圖

晉人愛書學野鷺庾家諸郎真不俗迢迢清晝圖畫開
此鳥依然在人目良工手握五色毫寫出江南秋一幅
羽毛絢目殊分明蜀錦新裁仍細簇荷花似避顏色鮮
搖落紅衣動盈掬將身不入樊籠中長年占斷澄江曲

江湖取友為顧景德題

平生雅愛江湖遊金蘭之契皆同流道逢傾蓋即如故

詩歌伐木堪相求江波濯纓清可掬湖上乘舟頻往復
何年許我社中來處處鷗盟慰幽獨

題宣廷吉畫

山童莫訝停車早紅樹白雲秋色好滿前風景入詩囊
何必探奇訪蓬島十年不扣松下扉披圖轉覺情依依
因之翹首南天外落日平蕪孤鳥飛

含清樓

陽山何逶迤銅山何嶢巖狀溪隨山知幾灣我樓正在

溪山間樓上四面皆青山溪流抱樓隱若環當時山水
皆舊識久戀君恩歸未得山風溪月夢悠悠十載相望
勞我臆

送楊司諫之南京

同雲漫漫未成雪故人握手都門別馬蹄蹴裂沙河水
雁聲叫落淮陰月關西自古清白聲甲科早掇超羣英
手持風裁下南國諫草日日來承明

送錢學士使安南

斗南迢遞安南國帝命封王製金冊維時奉使屬儒臣
二月春風動行色先生落落文章豪清氣上薄雲天高
柳色如烟迎玉節桃花和雨點征袍行行漸入安南道
數點青山望中小昭宣恩命及遐方金臺有約歸須早
九域聯翩星使多使彼安南能幾何先生令望重當代
竹帛垂名當不磨

題尚朴翁卷

太古云已遠斯人獨返淳有書閒白日無夢落紅塵鳥

迹平沙晚花香小選春澹然保終始不愧葛天民

菊莊為蔣翁題

有地惟栽菊無心種百花泉香儼甘谷選癖是陶家但
得歌常醉何妨酒屢賒物情與人意相對樂年華

歸樂堂

十年遊上國此日賦歸歟倦却風塵路來尋水竹居山
行春載酒門掩晝翻書薄暮投林鳥相看意自如

贈華陽處士孫以信

句曲幽栖處分明小洞天浮生空富貴幻迹自神仙梅
月閒中詠松雲醉後眠何時尋舊約重泛剡溪船

送胡長寧侍親南還

禁近官階峻榮歸寵渥偏親年逾八十客路渺三千元
老頭垂雪仙郎思湧泉一門忠孝備光彩照青編

朴菴為張原哲題

隱居遠城市踪跡謝紛華有空能容膝無園可種花養
親惟菽水留客只茶瓜坐榻全無足欵簷欲墮牙借書

尋舊友賒酒仗鄰家清世真堪樂豐年亦可誇葱湯并
麥飯一飽卧烟霞

湖山遊樂卷為薛楹題

公子南遊日湖山興最長鳳臺芳草綠鷺渚落花香銀
甲來紅袖瑤琴出錦囊煙霞登碧巘風月泛滄浪對景
開詩卷追歡送酒觴五雲天咫尺回首思茫茫

耕樂為吳元善題

移家南郭外卜築類斯干園內有紅腐盤中不素餐膏

梁防侈靡稼穡識艱難春釀頻留客秋租早了官兒孫
晨夕見親舊往來歡鄉約時相戒農書屢自看深缸湯
最煖軟草座偏安罷辱渾忘去雙眉永不攢

隔湖書屋

何處深藏萬卷書隔湖南畔有精廬侵塔細雨生芳草
蒲架清風落蠹魚此日彈冠兼吏隱他時載酒雜樵漁
乘閒欲訪王猷宅不待山陰夜雪餘

僧舍嘗茶

縑流不類玉川家石鼎風爐自煮茶往日品題無客和
先春滋味向誰誇中冷泉畔稀行迹陽羨山中好物華
安得鳳團携至此玄談清啜對梅花

松軒為任廷芝題

幽人結屋青山下種得長松三百餘
啟蟄蒼龍上霄漢
將雛白鶴到階除
四簷雲氣長垂幕
一榻秋聲可讀書
我亦平生羨弘景
買山何日與同居

務本堂

一自司天宦蜀中，至今家世盛螽蟄。
叢遺芳久佩君侯印，食力同為田舍翁。
部落買牛邊徼靜，閭閻祈穀歲年豐。
只今侈靡多淫俗，誰似高堂有古風。

內閣二瓷缸，乃是憲廟所賜種蓮者，久已無花。
今復盛開，因賦一首紀事。

太液池頭一種分，香風乍起隔簾聞。
清留葉上團團露，紅動波間冉冉雲。
道眼濂溪曾入詠，仙姿姑射易成醺。
年來定有如船藕，莫問當時太乙君。

虎丘寺

閭闔門西第一峯，烟雲踏破幾重重。
聽經石在猶疑虎，鑄劍池空亦有龍。
古木撐空知歲久，閒花繡地覺春濃。
老僧留我盤桓處，隱隱東樓起暮鐘。

內閣芍藥一首呈李先生

禁城遲日曉陰陰，紅藥翻階紫閣深。
香雨乍沾殊有態，綵雲長護豈無心。
玉堂封植人何在，金鼎調和事可尋。
幸遇清時多暇日，退朝嘗得對花吟。

竹居

構得茅堂一選深
種成蒼玉翠陰森
雲霄萬里鳳飛去
風雨滿空龍亂吟
葉積階前無過客
笋穿牆外自成林
鬢食霜虐雪知多少
要識平生君子心

壽商少師先生

台鼎三朝第一功
暮年高躅付冥鴻
虞廷喜起賡歌裏
魏闕瞻依夢寐中
萬里滄洲多散地
五雲阿閣有清風
何人為和南飛曲
回首蓬萊曉日紅

壽海虞李封君配徐夫人同七十

滄海東瞻聚壽星百年同受衛生經
杯浮澠水多春酒
窓列虞山有畫屏
鸞語重頌天不遠
鹿門高隱地偏靈
只應白玉堂中客
手挈諸郎想過庭

送九江郡判鄭廷韶

雲暖天衢雨浥塵
清風雙旆遠行人
舊從桂籍知名久
今向楓宸拜命新
天入九江連郡治
星羅萬室擁編民
廬山五老多形勝
公暇何妨覽眺頻

送李學士南歸

采采黃花帶露餐，出塵風韻似君難。
文章早入韓公室，詩律先登杜老壇。
三館並遊誰老少，百年相見幾悲歡。
馬蹄明日燕南路，草軟沙平雪迹乾。

送沈時暘之任

三年宦邸最相親，惜此分攜及暮春。
投盼可能將白璧，笑談聊爾破清塵。
東城雙旆花香滿，南渡扁舟月色新。
便道還家良足羨，持觴稱慶樂天真。

送尹正言父還泰和

清朝有子侍彤闈，祿養如君古亦稀。
仙液浮香供夜寢，宮羅剪綵作春衣。
謾論人世如浮梗，還憶家山好采薇。
萬事不干真吏隱，野鷗從此共忘機。

送王秀才下第南歸

春明門外送君行，望望東吳兩月程。
觀國重來三載後，寧親此去一身輕。
留心夜案囊螢讀，洗耳朝陽聽鳳鳴。
持贈漸無青玉案，短吟聊爾慰離情。

送年都憲改福建僉事

繡衣玉節下征軺東望甌閩萬里遙攬轡羨君能奉使
鳴珂慚我舊同朝聲馳八郡秋霜肅氣歷三山瘴霧消
當寧憂民心正切呻吟指日變風謠

送徐士亨歸江陰

征軺早發都門道強欲留君計不成五夜芙蓉城裏夢
一杯楊柳渡頭情他年擬踏金鼇背此日先聽彩鳳聲
遙想解元坊下路里人無數插花迎

送丁巡簡赴任順昌

晉陵才子三公後一命還沾雨露深
此日風光辭北闕平生聲價重南金
故園春滿桃花塢官道雲連荔子林
清世不勞神射力公餘拄笏足高吟

送錫山邵二尹還任

清時曾應賢良舉藉藉鄉邦令譽馳
白晝哦松知散逸紅亭折柳惜分攜
新秋驛路蛩吟早斜日江汀雁落遲
要秉清勤慰民望遷書指日下彤墀

送凌尚寶使交趾

綸音捧出大明宮，萬里交南指顧中。
使節煌煌隨日去，皇恩浩浩與天同。
馬前好景山如識，鳥外孤松道自通。
致幣有期歸思急，春風相迓禁城東。

送郡幕鄭君慎致政

幕府才華擅老成，紅蓮綠水若為情。
親庭甘旨三年曠，人世功名一羽輕。
拂袖已酬泉石願，買舟先促水雲程。
遙知歸隱無餘事，詩酒鄉中樂太平。

送王民望擢河南少叅

早年青瑣擅才名，薇省叅知政不輕。
長劔倚天酬壯志，疎鐘落月動離情。
夷門山色吟邊見，洛社秋光馬首迎。
應與三槐綿世澤，聯班鸚鵡位三卿。

送崔都憲

兩藩清譽動朝端，高擢都臺信不難。
玉律春風吹谷暖，冰壺秋月照人寒。
斗南自昔推仁傑，海內于今仰謝安。
霖雨早施蘓旱望，行行旌節莫盤桓。

送江東之歸省

秋日都門楊柳稀
離杯纔罷儼驂騑
太冲作賦三都重
司馬題橋萬里歸
下峽濤聲隨處有
連雲樹色望中微
玉堂金馬論思地
早約揮毫向瑣闈

送彭彥實還安成

冠蓋如雲挹別觴
都城東畔送元方
征鴻嘒嘒聞青海
禁漏遲遲想玉堂
列嶂絕憐秋似畫
好詩應費錦為囊
鄉園故舊歡相賀
棠棣聯芳化日長

送邵日昭歸省

苑樹寒催萬戶砧，鄉山回首十年心。
宮恩早已承新假，家慶從知得好音。
旆引鳴珂秋郭遠，帆隨飛舶暮江深。
綵衣拜舞高堂上，却喜霜華未滿簪。

送卜從大湖廣僉憲

刑曹聲譽有誰如，鄉曲相過數起予。
守已但持三尺法，治裝惟載五車書。
惠文制古冠還豸，丙穴名嘉食有魚。
此去外臺當益振，贈言斯記暮春初。

送陸進士省親

身被恩光出紫宸，曲江花下少年人。
青驄別去金門曉，彩鷁歸時梓里春。
具慶庭闈應共喜，餘功鉛槧要相親。
雲霄事業伊周事，好向清朝早致身。

題畫

一聲啼鳥春林曉，轉覺草堂深。
更幽底事東風太相狎，飛花吹滿硯池頭。

向時載酒江東去，今日山陰載雪回。
一片閒情誰解得。

晚風溪上破疎梅

題蒲石

竹鶴老人神仙徒
漫寫九節青青蒲
一掬寒泉浸山骨
小窻相對真蓬壺

紅梅

自是清寒徹骨花
玉容春醉暈流霞
羅浮迢遞三千里
却與桃源共一家

東莊

百花莊上少陵老今見東莊有聘君先得春風到門第
一川楊柳綠如雲

題梅贈潘栗夫僉事

玉節新恩出建章臺臣心事有冰霜百花潭上春消息
都屬詩家錦繡囊

題牡丹

瓊樓高起彩雲端愁絕東風十二欄眼底芳春看欲暮
玉人消息鳳笙寒

題鷺

杜若花香水滿洲
柳風輕颺頂絲柔
從來懶逐鷓鴣侶
萬里滄江狎野鷗

題雪景

雪滿山前路欲迷
誰傳春信到南枝
想應兀坐幽窓下
正是新詩得句時

石倉歷代詩選卷三百八十九

欽定四庫全書

石倉歷代詩選卷三百九十

明 曹學佺 編

明詩次集二十四

謝孟安

拙吟一首奉寄叔固賢表

憶昨與君別春風三月時感君不我棄祖餞當路歧
斗酒不成歡揮手重致詞別來今幾月兩地遥相思
人生

貴知己愛我其有誰惟君頗同調締交無所疑君如雲
間鶴飲啄思天池天高風露寒歸宿青松枝又如渥注
驥胸藏千里姿俯首槽櫪下伯樂顧何遲讀書破萬卷
老蒼咸見推嘉遯白石礪所友鹿與麋富貴等浮雲游
心書與詩遙遙出華胄雅稱為白眉而我魯鈍質鬢髮
今成絲忝沐明主恩列銜白雲司就養盱江郡黃堂望
巍巍屈指閱寒暑出入聊在茲思君不可即山川杳難
期有時動歸念目極閩南陲偶因鴻雁便空緘意無涯

游天池山

夙性愛丘壑不憚窮躋攀茲峯特神秀上抗浮雲端幽
尋嘆竒絕俯瞰何其寬同游六七輩一一皆儒冠嵐翠
襲衣袂風泉聽潺湲絕頂有巨石平鋪勢團團天成幾
窪窟奚用斤斧鑿冬夏水不竭可以怡心顏泓澄映星
象風雲常往還古人善取譬名曰天池山東望大瀛海
萬里生波瀾中流屹孤島袤延若連環在昔富喬木今
見餘榛菅我昔家上頭凝睇生悲酸馬鬣委草蔓歲久

恐滅漫春秋缺拜掃於心曷能安繁華感疇昔歲月如
驚湍人去山已空野鳥鳴間關有時動歸念恨無雙飛
翰歎息川路遙跋涉誠艱難而我今白首夢寐空盤桓

感遇二首

芳郊殘暑退夕露沾我衣長風送歸鴈落葉辭故枝以
茲感物候惻然徒自悲矯首望片雲去去將何之

夕露下庭阿涼風起天末庭際秋蟲鳴褰裳步微月顧
影獨徘徊故人殊契濶思之不可即山川渺難越

秋興

矯首望河漢，瞭然天氣清。
露冷梧葉疎，雖雖鴻雁聲。
而我客，盱郡得為簪。
組綰望南飛，雲惆悵搖心旌。

泊舟沙溪是夕雷雨大作須臾復霽有詠

舟泊清溪許，寒沙帶淺流。
震雷翻峽口，急雨打船頭。
欹難作寐，當杯不解愁。
須臾晴霽好，新月半輪秋。

游中洲觀

二水交芳洲，群峯四望幽。
樓臺參碧落，雲物訝丹丘。
宛

若登仙府須從渡客舟往來應不倦撫景重夷猶

送玉融莊克榮從戎四川

念爾事戎行間關道路長扁舟愁灑灑匹馬過瞿塘猿
嘯驚殘夢鷄鳴沿去裝到時書尺素好趁鴈來翔

初五日至延平城

鐔津城下駐行舟山水依然似舊遊兩岸樓臺看縹緲
一川風景重夷猶夜深漁火明沙岸月落寒更出戍樓
白首西遊欣就養雙旌遙憶待盱州

奉送蘓判府往湖廣便歸南京公幹

王事驅馳賦遠遊
太平橋下促行舟
百壺美酒成酣宴
幾樹垂楊綰別愁
風送樓船飛彩鷁
月明笳吹起輕鷗
此行到處堪乘興
楚水吳山豁遠眸

大旱建昌府祈雨其觀有象笏金龍乃唐玄宗
勅賜道士某者尚在

麻姑清絕境空谷有龍湫
靈貺傳今古深源映斗牛
禱求神莫測吟眺景偏幽
坐見風烟起行看樹木稠
為霖

驅早魃出澗溢田疇樓觀凌天外松杉夾道周藥欄青
蘚合丹竈白雲留象笏頽前代金龍鎮急流居人投短
疏太守舍鳴騶躬詣深潭側徒行峻嶺陬黑雲隨馬首
紫電繞林丘萬物回生意三農幸有秋

閨詞二首

昨夜生幽夢分明見藁砧相違多歲月同念少年心
望斷江山路書成過鴈稀每愁霜雪苦何處寄寒衣

題墨竹

三徑清風絕點塵一枝瀟灑倍宜人渭川千畝徒為爾
何似湘紉寫更真

宿山店

楊柳依依拂井闌寥寥一犬護柴關山翁荷鋤歸來晚
問我西遊幾日還

昭君出塞圖

漢宮別去冒胡沙淚濕花顏鬢脚斜抱得琵琶歸絕漠
相傳此曲出中華

竹枝詞

門前江水綠如苔送盡行人日去來
潮落潮生猶有信不知卽去幾時回

謝文著

題廬墓夢感卷為東平王思學作

築室依墓傍思親何太苦
匍匐三年喪悲哀一坏土怨
逐青春歸不知白日午積念感鬼神
餘芳振前古

分祿養親為高孔明司訓

君不見東吳兒，桴蒲十萬輕如絲。父母饑寒知不知，又
不見西鄰士，一錢尺帛私妻子。借鋤取帚立，許語噫戲
薄俗不可醫。長安太守淚涕洟，天經地義誰識之。高君
高君堪仰止，九載青氈寒徹底。三釜平分出太倉，祿養
養親親，獨喜世間九鼎徒為爾。

江山覽古為吳以傑隱士作

乾坤納納無今古，世事悠悠總塵土。扁舟昨日下午吳門
百花洲頭長芳杜，姑蘓臺上麋鹿遊。虎丘山下霜葉秋。

延陵高誼劔光白天塹長江王氣浮石頭城俯投書者
日暮寒潮自來去采石江邊訪謫仙浩歌誰惜澄江句
淮揚風物殊可人崇儂觀裡瓊花春垂揚依舊漲晴綠
不見龍舟來水濱秦淮夜泊天將暮淺水煙籠月明處
欲弔當年胯下人猶愧江頭浣紗婦歌風亭廢蔓草多
戲馬臺空牧豎過興劉蹶項兩陳迹地老天荒奈若何
我生幸有斯文在鄒魯相傳幾千載曾尋洙泗泝源流
迢視江河望滄海勸君莫上黃金臺昌國祠荒生草萊

下齊餘烈情無識頓令壯士心成灰君遊湖海頭應白
睥睨猶嫌天地窄欲窮往古與來今笑洒胸中萬斛墨
春軹別意為郝君作

乳鶯啼處柳初眠點點飛花撲錦鞵玉節遙臨新郡縣
星軹歷覽舊山川北恒草木思甘澤南國黔黎解倒懸
相送黃金臺下別逢人莫說杜延年

過燕城有感次前公韻

鹿失龍興世幾更青山如舊遶荒城春深麥秀花無主

歲久臺蕪月自明勝國諸陵多雨積甘棠故地有人耕
我來弔古情無限幾度經過恨未平

和通府楊寅丈詠雪韻

幽薊天寒酒未醺擁爐相對雪繽紛臺平馬露雙尖耳
野曠天低一色雲淡月明時光倒影寒鴉落處篆成紋
細看古史消長夜遙憶擒吳舊日勲

次大叅王公遊南山韻

雲外青山江上峯僊居幽絕翠重重碧桃花落無人掃

玉筍經藏有，蘇封豹變南山。秋霧潤龍歸古洞，暮雲濃
留題但識閒年月。豈問曹溪第幾宗。

薇垣替政

高才佐理振聲華，畫省優游沐寵嘉。案牘不勞機務息，
月明閒對紫薇花。

謝士元

倪寬帶經

家貧事力作，經籍還相隨。鋤耘頗休暇，諷誦聲伊吾腹。

中富文字亦草封禪儀白日馳駒隙不學將何為

匡衡鑿壁

入夜東鄰火熒熒照華屋鑿壁引餘光經史了可讀更
闌燈欲燼我讀聲更速當時善說詩咸稱有餘馥

諸葛興漢

龍卧南陽廬管樂聊自比感激三顧勤幡然拂衣起君
臣際會間恩義契魚水二表誓出師忠誠泣神鬼

祖逖誓江

腥羶穢河洛人人保生存誰知忠義士直欲清中原擊
楫吐肝膽水神亦銷魂功名未弘達慷慨誠足論

岳飛恢復

夙性秉忠孝豈惟將才優兵威振雷霆行見復神州垂
成誤和議端居懷隱憂寃含莫湏有感之淚橫流

文天祥就義

身與道義俱浩氣塞蒼旻戮力濟艱危何曾辭苦辛南
奔日窮蹙北歸思殺身至今正氣歌罷傷吾神

余闕守城

煙塵暗九關，王室勢如燬。
矯矯魯諸生，擐甲守孤壘。
援絕力難支，身亡心不死。
至今清水塘，時復悲風起。

和遊仙亭巖韻

載陟仙亭巖，塵寰渺如許。
旋復造其巔，追隨有誰與。
力疲行且休，寒崖不知暑。
山花向人開，山禽學人語。
天風吹我衣，飄然若仙舉。
悠悠巖山雲，無心自來去。
此雲同我心，坦然無鈎距。
石逕阻折盤，扶攜喚童暨。
湏臾歷坦

途一望一延佇竒哉雲外峰未許誇天柱樵歌聞遠林
窰烟冪孤嶼而我鷓鴣儔偶接烟霞侶行厨具盤飧對
酒迭賓主美景諧賞心良辰適情緒何人吹鐵笛聲在
雲深處勾引天籟鳴嘈嘈雜宮羽睡起醒未醒臨風啜
茗乳日夕山冥冥歸途識前所度嶺下肩輿徐行避深
阻磨崖便題詩不待催詩雨回首望白雲迢迢隔蓮宇

寄地官孟喬友兄

一別二載餘雲樹渺千里因風寄尺書慰諭情彌至嗟

予生苦晚時卦轉逢否解驂豈無人彼乃植桃李與世
既多違強顏心所耻年來竟衰謝尋常忘世事田園久
蕪沒行當事耘耔淵明歸去來尚友亦云易殷勤愬衷
曲念君最知己前年寄書畫裝演頗精緻葡萄四幅練
魚繭石田字秋香有五本彷彿赫蹏紙一幅山水圖輞
川亦不異珍重襲方積庶幾可遠致歲月雖稽延此意
望研揣

贈郡庠習射諸友還南昌

禮書厄煨燼掇拾無全篇皇明啟文運禮樂俱昭宣顧
茲禮射文紹述千載傳方其未射時烹狗獻賓筵抗侯
戒將射弓矢鈞且堅主人德自將賓耦序其賢賢則射
多中不侮猶宜先堂陛別高卑威儀見周旋內志既云
正外體寧或偏挾持須審固破的皆應弦筭以紀其勝
朴以繩其愆論藝罰斯寓卒射樂亦懸繁文與末節一
一由自然豈惟定民志伊欲全吾天禍亂何由作家國
綿萬年大哉禮之射吾子宜勉旃

麻姑山讀顏魯公碑次左天官韻

嗟嗟顏魯公仙都有遺筆
晦蝕幾百年忽然見今日愛
公非愛書於心若有失所以甘棠篇珍重良不一鑿石
亟珍之千古表陳蹟仙都賴壯觀誰能忘遊息

遊麻源三谷

作郡逾七載今日偶獨遊石徑雖折盤去去山更幽
人家隱叢篠葑屋無岑樓我欲詢民俗肩輿因少留
踉蹌走村豎三五遮道周俯首拜君侯俱言今有秋禾黍已

登塲年麥行見耒公租少逋負里胥敢誅求民情已如
此聞之我心休於焉度重嶺風光豁人眸村春轉雲碓
石橋架迴流前有梵王家巍巍俯林丘門前列松檜白
日風颼颼老衲出相迓長跪禮數優熏鑪與茗碗相奉
何綢繆涓臾出盤筵有藪亦有羞新酒不盡飲詩句任
冥搜侍我程氏子資質如琳瑯年少總知學我唱彼亦
酬引我訪古祠祠下渟龍湫祈禱輒靈應此語證前脩
試登華子岡岡前行平疇再步翻經臺臺荒林木稠山

果自瑣碎野鳥鳴啾啾聽之不憚聒亦足紓煩憂歸來
不覺晚零露襲敝裘

次叅議彥彰左公遊麻姑山

縱策入烟蘿縈迴度空谷更上齊雲亭憑高騁雙目崖
泉掛晴虹恍惚匡廬瀑仙子多樓居棟宇雲間直巖野鶴
唳還飛瑤草冬更綠山神盼靈響敬畏予所獨於焉舉
裡祀祈年屆佳穀華華魯公碑昏訛猶可讀義烈感精
神直期相追逐載誦泰伯詩調古誰能續

題太平別業

吾道重卷舒所屬皆真樂建溪有閒翁謝事老林壑結
廬面一丘幽深更磅礴綠水浮前滌青山連近郭齋居
竹為床野服冠用籜遺後多積書却老剩栽藥先春理
鋤耨課僕事耕作秋來三逕黃風葩間霜萼看雲還杖
藜棗熟或自剝鄰叟時經過忘情共歡譁野興不自持
攜琴領孤鶴有時發商歌聞者咸驚愕何人知我心我
心無愧怍萬古此江山因君愈恢廓老我鞅掌懷卜鄰

敢忘酌撫卷憶鄉山千重雲漠漠

歸省不允情見乎辭

寒簷乾鵲聲楂楂銀缸暎暎夜吐花客中見此訝欲仆
謂今抗疏當還家豈知時事有齟齬歸期却誤東陵瓜
吾家南維八千里無諸古國天之涯黎關入雲建溪險
驚蛇水勢逾三巴微茫親舍在其下白雲故故飛來遮
堂中雙親逾半百白髮種種紛髻髻虞淵砮劄逼歸日
魯戈虞劍勞騰弩晨昏滌瀆曠莫展愧彼反哺城頭鴉

以茲盱眙若蒙替鄉心歷亂如焚麻退公對案不能食
空有飢餒兼羅閣寒宵寂寂耿無寐愁聞摻摻譙樓柵
霜風入簾砭肌骨擁衾起坐盤僧跣憶從充賦齒上士
八年逼側遊京華兒曹尚未厭糠粃寧繡鞞悅矜紛奢
追思辛螯悼前監俛就新懦懲杯蛇我道未夷且宜爾
任渠閣閣喧春蛙一分寬民素所念况忍作俑王涯茶
河漭伐檀致深意微吟喁噉還咨嗟天恩穰穰等覆幬
三載幸見崇褒嘉踈慵顧此竊自慶賢勞鞅掌寧矜誇

方今求賢感寤寐鹿鳴寵遇張吾置懷瑾握瑜奮側陋
曳裾戛珮鳴衝牙棟梁明堂總杞梓驂服大路惟驪駟
追蹤無為戒叢情宴樂有酒歌鱣鯨仁恩豈惟育羝犴
亦見茁彼春田葭群賢戮力治功懋光被四表無幽遐
辟彼三光麗霄漢顧我榮爚何須加曾聞至孝格穹昊
大庖蓮莆今生芽又聞歸省有常典此典辰告非云賒
我今上請理固當乃爾反覆非命邪

送鄉進士金臺王君載道

日經中街晝景長飛虹橋接曹溪香人間炎熱此差強
我攜同輩來翱翔赤脚共踏層冰涼却笑河朔耽壺觴
興來啜茗搜詩腸書罷魚鱗皆文章顧我蕭散還慨慷
何須子登彈八琅平生景慕朱紫陽歸來展卷心自忙
雲霄有路期相望

九月望後雨雪與同寅分韻賦詩效禁體

蓐收視政操機權群陰用壯陽氣腴四野同雲異搜兌
須臾六出何紛然初訝旛旂舞容裔還疑龍鳳來踰躑

密粘碧樹藏。斐亶亂歷黃。荊催鮮妍清。光晶瑩炫草屋。
寒氣顛負侵吟。擅幽巖饑餓困。虎兇澄潭冷。蟄愁蚊蜺。
長江漁人理歸棹。平原獵騎橐空。奏豪門邀賞侈。供帳。
佳人怯冷加錦纏。邊師或繼蔡州捷。高士誰放山陰船。
人言盈尺即為瑞。我今驗此知豐年。陰陽變理在賢相。
此事自足徵諸天。美酒不效党家飲。雄辭竊慕梁園篇。
同袍况復好鉛槧。試把詩句窮鑄研。且共登壇申約束。
接戰不用橫戈鋌。安仁賈勇擅甯距。伯始顛氣誇手拳。

穆之張君嚴黓鞠蹇予惟怯蹲中堅一時勝負且勿較
聊尋故事追前賢

題畫梅

羅浮仙子真崛竒天然標格冰霜姿歲寒心事老天識
調羹手段何人知以茲落魄孤山下弄月吟風足瀟洒
冥心靜裏悟乾坤自有香風抗蘭麝今日塵埃偶相逢
巡簷索笑聲颯颯相邀欲問徂徠子當年何事受秦封
江空歲晏路云邈且爾寄傲南窓中

霧閣曉粧

東風吹散梨花雨，百舌枝頭報晴曙。遊仙驚覺奈將何，
起揭流蕪悄無語。摩挲兩眼穿錦襠，塞酥掩腿懸香囊。
牙梳縮就盤龍髻，波斯飛出雙蛾長。玉顏自是無人比，
更把鉛華助嬌媚。十尖盡染守宮花，額前又點寒梅蕊。
粧成掩鏡問小環，今日何如前日美。

和嚴太史白堂閒坐

道院何寂沈，端居想虎闌。籬花開更落，梁燕語還飛。不

嘆生涯薄惟憐故舊稀
起來聊隱几靜看篆煙微
燕坐探元化莫花子細看
龍蛇成筆陣風月淨詩壇古
砌苔痕匝空堦蟾影盤
壯懷憐老大無復惜春殘

何處難忘酒和白樂天二首

何處難忘酒元宵
午夜天星燈交燦爛
人月鬪嬋娟
巷陌聯車騎樓臺咽管絃
此時無一盞奚以慶新年

何處難忘酒明時報政嘉
有人歌豈弟到處長桑麻
事簡常封印庭空早放衙
此時無一盞奚以度年華

仙洞春遊和韻

登山馬首東下馬策吟筇日霽林光淨雲開樹影重
曉鐘驚宿羽春澗起潛龍授我長生訣分明守絳宮

五丁峽

梁州書禹貢黑水著圖經道路通三輔巖崖鑿五丁
金牛言誕謾石鼓事沉冥獨有懸鐘石分明上勒銘

過鳳山

黎明登鳳嶺亭午造其顛俯視南山小平臨北斗懸足

移青木杪身在白雲邊蜀道難今見詩成愧謫仙

送貳尹林君孟器致政還家

官居斗邑宦情微未老投簪早見幾門外新開松菊徑
山中間製芰荷衣甘同倦鳥投林宿笑看浮雲作雨歸
心欲掛冠猶未遂輸君先上釣魚磯

挽徵士吳康齋與弼

小隱都忘大隱名當時士類仰儀刑詞源浩瀚傾三峽
學術分明本六經儘有聲華諧物議更無形迹笑山靈

可憐故里蒲輪道歲歲春風草自青

和左天官弔岳王墳

鐵馬歸來偃綠沉三軍朝氣散秋陰偷安正是奸諛計
報主何知國士心湖上青山埋白玉人間遺像鑄黃金
春秋不廢蘋蘩薦精爽洋洋儼若臨

和左天官遊麻姑山

肩輿度嶺晚穿雲不惜攀躋到夕曛松徑風微猿抱子
芝田雨過鹿呼羣霓旌縹緲來金母羽蓋翩翩降道君

仙境沈寥人境遠
四時風月許誰分

題柳湖書院

幽居偏喜遠紛諱
一室蕭然任綴蝸
疎柳數株陶令宅
遺書萬卷鄴侯家
芸薰綉帙香祛蠹
墨灑華箋字染鴉
負笈從師真有志
太玄從此授侯芭

送趙用深還長樂

埋塊晴曦散曙鴉
獨攜書劍出京華
殷勤岐路一杯酒
汗漫江湖八月槎
遠水烟光連白鴈
故園秋色醉黃花

送君未得從君去，迢遞雲山入望賒。

送黃憲副之任廣右

冰蘖聲名簡帝心，觀風雋擢渙綸音。
一朝持節辭楓陛，千里驅車赴桂林。
雨過荔源青似染，雲開堯嶺碧如簪。
懸知按部春風裏，無限江山伴醉吟。

過小孤山

羣峯疊疊此峯高，飛盡晴嵐見翠螺。
砥柱祇今擎宇宙，關門終古壯山河。
林間殘照聞樵唱，天際微風起棹歌。

身在江湖心魏闕扁舟幾度此中過

琴

爨下焦桐巧斲成未絃素軫有餘清世人未悟胸中趣
雅操空傳指下聲宣父猗蘭留古意商陵別鵠寓深情
臨邛錯與通消息千載風流笑長卿

過威州

汶川曉發赴威城半羌夷少漢氓荒歲民貧懲重斂
邊關盜息罷長征馬乘危棧空中下人挾飛仙樹杪行

王事馳驅忠蓋在賢勞未敢竊時名

威州道中

州雄百雉石為城坐鎮令人勁氣生
利槩長鎗湏破賊輕裘緩帶每談兵
將壇才俊遊年少麟閣功名屬老成
報國安邊原有志茲行肯使雪山輕

題潛溪宋學士祠堂

昭代師臣儒者宗旅魂奄過百年中
佳城改卜今玄圃睿句留題古闕宮
彷彿草堂棲杜甫分明石室祀文翁

後人不盡懷思意錦水滔滔日夜東

題諸葛孔明遺像

寤歌梁父輟耕耘帝胄臨門日未曛收拾綸巾辭畝畝
指揮如意布風雲一時魚水歡三顧兩漢山河得幾分
五丈原頭雲黯淡長星無計掃妖氛

小孤山阻風雪

括地西風陣陣寒須臾捲雪遍林巒高低樵逕迷行迹
遠近漁磯罷釣竿山聳兩肩愁粟冽霜添半臂訝中單

等閒寫就梁園賦造化分明在筆端

留別部院諸公詩

西風漸覺透征衣萬里還家正及時
近寺餞行曾有酒今朝留別可無詩
清朝我豈深慚拙白首盟鷗自笑遲
江海茫茫霄漢遠致君勲業在臯夔

續賦疊留別韻

城都放棹下青衣魚復重登弔古時
沙磧陣圖諸葛略草堂秋興少陵詩
晝行每訝江聲壯夜泊翻嫌月影遲

舟過巴東回首望巫峯十二遠連夔

寄吏部彭亞卿

秋風黃葉豈無情
偏稱南歸日夜征
客路江山如有待
舊時琴鶴尚隨行
秦廷完璧終無負
同舍遺金久自明
才具濟時君獨步
一時聲價重連城

寄林諭德

一夜西風不世情
布帆風飽晚猶征
窺窓明月如相識
拂地垂楊似送行
青嶂暝連秋冷淡
銀河低映水空明

中宵不盡懷人意起看奎躔照鳳城

寄太僕王少卿

尊鱸忽起故鄉情千里歸橈幾日征但得青山舊隣在
那言白晝錦衣行晚程驛路含烟暝晚泊漁燈隔岸明
却憶右軍才俊逸詩名不讓謝宣城

同張內翰訪羅景明過磁溪偶成一律

肩輿追逐過磁溪山犬無聲野鳥啼冒雨每防苔徑滑
穿林偏覺暮雲低人家引水春雲碓野圃編荆護藥畦

喜有瀛洲文伯在試將詩句共留題

同張內翰遊麻姑山

一線天開玉柱峯峯前僧寺講時鐘
棋盤便是三生石
秋色偏宜五粒松
雲外楓林無鳥韻
雨中苔徑有人蹤
東君載酒同行樂
詩興何如酒興濃

過呂梁

扁舟泛泛過房村
滾滾河流勢欲奔
疏鑿尚傳神禹績
往來偏荷聖君恩
上洪舟楫牛牽纜
賣酒人家瓦作樽

才具濟川俄頃事晚來沉醉傲詩魂

過清源

重過清源歲暮天風光如舊見豐年
回波拍按三千舞歸鴈聲寒五十絃
珠履狐裘人似玉錦鞵銀鐙馬連錢
繁華不入詩人眼獨擁青綾日晏眠

和韓少叅貫道寫懷詩

江行高掛夕船燈絕似浮杯野渡僧
瘴雨蠻烟經幾許殘山剩水見多曾
遠遊正可追司馬前定何須問惠能

同事有人親筆硯鼓琴奚事說孫登

謁黃陵廟

佐禹勤勞八載間
黃牛神化播塵寰
當時水土憑刊濬
今日舟航任往還
鹿角虎頭江上路
錦屏螺髻廟前山
經過詞客歌靈貺
管內纔窺豹一斑

宿淅江驛

傳舍薰風五月涼
客懷如水正茫茫
湖山翠滴芭蕉雨
苔石青連薜荔牆
醉飲忽驚蓬鬢短
離愁偏入夜燈長

青簾畫舫錢塘路錯認井州是故鄉

望餘干城

遠市欲浮將郭遠好山終懶過江來平臨一水玻璃色
下瞰千林翡翠堆鴉背斜陽翻睥睨雲中高閣望蓬萊
碧潭長鎖蛟龍窟定有神光燭夜臺

遊絲和韻

萬縷悠揚拂地垂東風有意不須吹窻前映日穿疎箔
花下留人掛接羅逆旅挽回千里恨閨人惹起百年思

無情最是尋春者擊斷遊鞭故故遲

和竹茶竈詩

天地胚胎骨格幽渭侯那作晉風流銀鐺煮月當晴夜
石甌凝雲帶晚秋出處有時高士共炎涼無間故人稠
玉甌金碾相將久擬待春風到雅州

竹茶爐為僧題

僧館高閒事事幽竹編茶具淪清流氣蒸陽羨三春雨
聲帶湘江兩岸秋玉杵夜敲蒼雪冷翠屏晴引碧雲稠

禪翁托此重開社若箇知心是趙州

遠浦歸帆

日暮大江平依微見歸艇
幾幅飽西風須臾楚天迥

山寺晴嵐

山郭媚晴曦浮嵐散芳樹
鷄犬寂無聲人家已深處

烟寺晚鐘

百八振磬遠送斜陽暝
烟際聲未沉歸僧在蘿邈

漁村落照

返照射江皋寒鴉閃歸翼理棹回中流澹彼南山色

遠梅

我居江北爾江南千里幽香鼻未參安得故園明月夜
花前賓主共成三

夢梅

西風昨夜到茅廬勾引吟魂會老逋羌管數聲驚別夢
一天涼月碧窓虛

清源曲

金步四
卷三百九十
朱唇玉指品鸞簫一曲新翻澁未調
報道客來猶不信
果然門外繫蘭橈

無題

雲外青山樹外樓
雪花飛綴景偏幽
奚奴款段閒遊客
恨殺朱簾不上鉤

和孔昭留別

故國曾憑夢裏還
關河迢遞豈知難
春風門巷渾依舊
獨有薔薇覆畫闌

過銅鑼山

摳衣振策過銅鑼山犬無聲野鳥歌遠近桑麻連巷陌
讀書聲少力田多

倉頡廟

鳥跡分明取象精人文宣朗鬼吞聲千年遺廟空山裏
野雀猶來傍砌行

霍去病墓

嫖姚勲業迥無前卜葬還容附帝阡不畏石麟荒草沒

山形猶見象祈連

節義臺

一使匈奴久不回為憐高義築崇臺
鄉人千載思登眺肯使春風長草萊

龍尾溝

當時仲達號知兵此地如何駐魏營
懼戰却甘巾幘辱至今溝水寂無聲

楊家城

荒城斜枕渭河流
麥隴青青半是秋
三十六年全盛業
不應歌舞悞揚州

青岡嶺

晨炊已畢度青岡
石磴崎嶇十里長
勞苦不辭頻下馬
曾聞蜀道嘆王陽

雲臺

諸將匡成漢治隆
崇臺圖像表元功
于今不省丹青面
漠漠寒烟沒斷雲

江上諸峯

點綴烟花繡作衣
黛眉輕掃出羅幃
分明記得巫山頂
片片行雲帶雨歸

咏秋海棠

道院舒遲見海棠
錯教坡老恨無香
娉婷獨立西風裏
絕勝楊妃試晚粧

嚴光

先生蹤跡等巢由
明月清風一釣鉤
可惜漢家勞物色

釣臺終是老羊裘

無題

春來玉腕瘦三分
懶曳瀨湘六幅裙
景物撩人禁不得
閒看亂絮擘晴雲

過安慶

雙搖畫槳到同安
剪剪江風入夜寒
東望池陽在何許
青山盡處六江干

過池州

人家星散一孤城堂扁從容尚得名日暮孤舟江上泊
待明風雪逼人清

黃冠見客

年來最好鹿皮冠林下逢迎禮數寬天上故人多厚意
尋常對客不曾彈

題樵

遠近人家遠近山丁丁長斧白雲間等閒斫斷吳剛樹
收拾堪尋舊路還

題白菜

露莖風葉味偏清
咬盡能教百事成
寫出一根常寓目
知君忘却五侯鯖

石倉歷代詩選卷三百九十

欽定四庫全書

石倉歷代詩選卷三百九十一

明 曹學佺 編

明詩次集二十五

劉大夏

仲春陪祀先師于太學

吾道乾坤大神功
宇宙長六經垂憲
典百世樂虞唐聖
主崇殷禮春丁啟
舊章制從天上下
誠在幣先將斗柄

回霄漢鑿宮列冕裳爐煙環殿裊庭燎燭天煌颯沓韶
鈞奏清芬黍稷芳舞容輝俎豆歌吹雜笙簧肅肅神如
在顛顛氣若藏致恭三獻爵飲福再升堂遙聽青衿贊
稀聞玉珮鏘松陰移曉月人影散寒霜回首看車馬徐
徐過廟墻

陌上耕農

春風吹暖布新晴遠邇頻聞擊壤聲為樂自忘終日倦
遺安應效古人耕更無世故來縈慮只解農功是養生

堪笑宦遊江海客，幾人勲業著昇平。

早朝

夜色蒼蒼月漸西，千官待漏立金闈。
龍飛咫尺天顏近，虎拜從容珮響齊。
花近宮袍雲錦重，柳披春仗露梢低。
眼中並識文明治，東閣前頭取次題。

早朝寄所知

漏殘高閣月華低，曙色分來紫禁西。
簾捲香烟龍袞見，珮和仙樂鷺班齊。
陞頭咫尺承天語，花底從容坐御堤。

遙憶故人何處是
楚天雲樹望中迷

湖山雅趣圖為太倉張俞題

青山隱隱水悠悠
此日披圖憶舊遊
遠樹雲開湘浦晚
孤帆日落洞庭秋
萍踪自昔隨流轉
華髮誰今為國憂
却笑薄才終戀闕
湖山雅趣付君收

紅梅

別是江南一種梅
年年先占早春開
東風有意憐冰骨
凍雪無情壓絳腮
仙子自知丰格在
北人寧作杏花猜

雖然未見調羹實一寸丹心絕點埃

遊西山出城道中

曉來聯騎踏晴沙風景蒼蒼一望賒
幾處白雲前代寺數村流水野人家
鶯啼別墅春猶在馬到西山日未斜
回首不知歸路遠九重宮殿隔烟霞

尋功德寺失道

最是祇園佳境深白雲堆裏路難尋
禪房未了看花興
清梵空聞隔葉音酒醒微風雙樹遠
詩成斜日半山陰

相逢擬就湯休宿古鉢分泉洗渴心

六月三日登淨寺望西湖

誰將西子比西湖此日凭欄一弔蘓樓外江山依舊在
湖中歌舞幾時無自憐白髮千莖短徒有丹心一寸孤
歸去九重如賜問蕭條今日在三吳

送人還江西

黃金臺下唱驪駒送客南歸萬里餘一命未沾天子澤
滿囊空載古人書暖侵山雪新晴後春入江梅欲綻初

宦況何如家食好白雲飛處是匡廬

和李賓之再遊西山韻

匹馬迎風柳外嘶停鞭私語換前題
千年故事懷江左一路青山似鎬西
此地傳聞曾見虜何人談笑合封齊
感時無限傷春意潦倒都因醉後迷

乙巳二月在閩雨中度福安縣大嶺

青春作客幾經年白髮猶憐未息肩
領得絲綸來遠嶠不辭風雨度危巔
半空雲鎖渾無地一徑人通直有天

聞道前途山更險及時須着祖生鞭

遊閩中玄妙寺晚歸偶成奉同行徐沈二公

清時作宦得閒遊更喜祇園景物幽山色連雲迷晚逕
松聲繞澗雜寒流層臺回首諸天近半日凭欄百念休
薄暮歸來心更樂離離禾黍萬家秋

山居偶成

重陰逸屋蔽晴暉獨卧東菴半掩扉日似小年人事簡
風如太古世情稀石田有稻供蔬食野逕無塵染素衣

一段山居多少趣臨風幾度倦高飛

贈李西涯

蚤年書劔客京師愧以疎慵辱子知龍榜已欣曾並舉
鳳池猶幸重相隨交游滿眼還誰厚爾汝忘形有宿期
總道玄都盛桃李東風寧肯棄殘枝

赴廣東過東平馬上因簡蕭九鼎

奉命南來十二程風光感目不勝情幾家桑梓編新戶
何處松楸蔽舊塋問俗獨憐今日異留田敢廢後人耕

相逢莫道悠悠者，牧守如今是弟兄。

南寧遇冬至，雨中有感呈同事二王公。

風雨淒淒客思涼，况逢冬至在殊方。
愁看瘴嶺遮天短，獨擁寒衾覺夜長。
地雜夷情休問俗，庭無官事懶升堂。
醇醪幸接周公瑾，百感傷懷總欲忘。

聞從者談邕州土俗，東王僉憲。

邕州壤地接交南，淒楚夷風不忍談。
男女歌謠成沓禮，官民爾汝集茅庵。
瘴來山谷雲應黑，毒入溪河水盡藍。

漂泊獨憐吳楚客故園回首意何堪

往香上海上

煙波滄海九衢塵北去南來笑此身清世自慚無補地
白頭猶作未歸人故鄉兒女多荒廢仕路交游半隱淪
洛社詩成何日事楚江西畔覓香蓴

次西涯學士餞衍聖公作

欵枕秋風負勝招群仙遙憶下煙霄紅螺醮甲金波重
寶鴨迎風玉篆消古錦奚囊推賀筆清時吏隱笑由瓢

山花與主新名字老我吟成侑酒謠

題孫懋仁沱西別業

臨沱新作輞川莊喬木牽蘿接草堂山勢東環雲澤遠
水源西出漢江長秀鍾人物滋三世清統門欄擅一方
君實歸來須入社黃花釀酒日聞香

宿新樂縣壽聖寺壁間有唐人早朝詩依韻寫
懷

早竊湖南第一籌時承蟒玉寵光優八千里外充行伍

四五年前別冕旒
捧檄丹心憐我拙
乘桴滄海共誰憂
逢人若問停車處
直到關西最盡頭

過六盤山遇雪寄西涯閣老

平生自顧百年間
九分驅馳一分閒
綠野誤違三品地
白頭今到六盤山
水行雪渡知前定
運去年哀值後艱
寄語同年老知己
天涯孤客幾時還

藍州渡河孫守備領兵護行

界限山河漢與胡
生成天險衛秦都
初經邊塞勞軍送

老步冰橋倩客扶，故老千年思蹇叔。
長城萬里惜扶藜，不知鹿走坑儒事。
更有何人誠後車。

俞僉憲報京師信息

老年飄泊在天涯，番漢叢中信作家。
塞下風寒愁戍火，城頭日暮慘悲茄。
山谿險阻來時路，江漢微茫夢裏槎。
故舊乘驄來又別，殷勤為我報京華。

端午日感懷

東望鄉關各一天，閉門閒坐思悠然。
時催節候臨端午。

地盡江山到醴泉
徃歲憂勞渾是夢
老年耽靜似成仙
感懷吟罷無他事
祝頌君王有萬年

彰德別葉庭茂

臨岐莫厭酒杯深
此去何年更盍簪
秋塞比來多便雁
殷勤時慰故人心

題楊叅將出征

甲冑森嚴意氣豪
馬頭威振陣雲高
戎王膽落天山外
鼠首穹廬望羽旄

自題衣冠乘馬小像

博帶烏紗步驟遲風流不似陣前時將軍豈是乖戎畧
要使邊人識漢儀

謫回東莆田林都憲

到處烽煙警客腸津頭幸有濟舟航暮雲春樹懷人處
獨倚春風醉晚觴

戍中故舊無來見獨嚴仲洪贈詩和之

老冒風塵萬里行蒲輪今日出都城獨憐陌上王孫草

一任寒霜不世情

寄謝浙江陳都閩

荷戈老出玉門關
聖主恩深又許還
獨感多情陳閩使
音書頻問到東山

附李麟詩

宮詞

青春閒裏過華髮
暗中催往事俱流水
初心未死灰
御爐香縹緲
宮扇影徘徊
脉脉停針久
鑿輿幸倘來

和李商隱無題

花落蕭牆別院風，眼看漂泊水流東。
有懷團扇絨題在，無計長門買賦通。
翡翠夢衾春草綠，守宮愁臂夜燈紅。
十年怕見青銅面，肯信雲鬟半欲蓬。

又

心事無憑欲話難，幾經憔悴怕燈殘。
東風蝶粉春猶澁，西日蝸濡露易乾。
夢斷銀河銅漏滴，愁回金屋鎖窗寒。
臨鸞敢謂嬋娟誤，宮樣眉妝八字看。

牧羊圖

萬死間關抗虜塵
卅年北海未亡身
牧羊不羨彌山富
仗節惟拚齧雪貧
已分此生甘苜蓿
豈知他日畫麒麟
河梁相向降奴泣
白髮憐看漢老臣

東原為王廷直賦

越山迢遞接蓬萊
山下平原一徑開
樹繞江流天外盡
鳥分雲影日邊來
東風道路迷芳草
殘雪溪橋見野梅
安石未應高卧久
天涯回首獨憐才

楊柳枝詞

淡烟籠日影婆娑
露葉曾經步輦過
咫尺宮牆看不見
年年長是別離多

簾捲青青水殿涼
晚妝隨手鬪眉長
含顰待與君王折
一月看花到上陽

薛綱

宿懷化驛題壁

朝從辰溪來暮抵懷化
宿奔馳百里途祇博三升粟
嘗

求古人心謀道不謀祿我非行道具往來徒碌碌九年
不徙官揚雄老且禿歸草太玄經郊居掩花竹功名適
意休美味染指足題詩謝山靈茲遊恐不續

登黃鶴樓

憑欄瞰碧流拍手招黃鶴黃鶴去不來白雲滿城郭悵
望鸚鵡洲狂生不可作曹瞞尚忌才黃祖奚堪託文高
竟殺身身後名寂寞祇遺舊江山千載恒如昨

題蕭彥祥四景畫

昨夜東風入幽谷
春草生香春樹綠
茅簷星散八九家
中有先生讀書屋
讀書偏于靜處宜
白雲堆裏長吾伊
只恐鳴鶻陡然至
好山却被英靈移

黃菊花開黃葉飛
柴桑先生猶未歸
蕙帳風高夜鶴怨
石梁水淺寒魚肥
我亦天涯倦遊客
對景徒為增歎息
何由卜得柴桑隣
穩坐溪頭釣晴碧

秋夜思歸寄鄉友孫廷振

江漢思家客
秋來倍寂寥
碧山雖不負
白髮肯相饒
貧

戀無功祿官慚有道朝徒然羨冥鵠風翮任逍遙

宿慈利布政分司愛其北窓山水之勝題詩於

壁

縣境煙霞表微垣紫翠間覽窮南楚勝愛殺北窓閒亂
石長鳴水低墻不碍山休官堪吏隱地與廟堂關

石門至澧州舟中作

水從天際落舟破鏡中來古廟千年樹清溪兩岸苔
冠兼吏隱鷗鳥亦疑猜再到知無日東歸買釣臺

題山塘驛壁

辰溪三十里乘曉到山塘瘦馬千峰雪
征人兩鬢霜路如斜谷險梅似故園香
歲暮不歸去閒雲笑我忙

思歸

遊宦幾同星浮蹤一葉萍家貧羞戀祿
年老厭談經客鬢愁邊白鄉山夢裏青
何時鏡湖曲結取狎鷗亭

弔汨羅江

宗臣義與國同休誰謂先生可九州
死恨張儀曾相楚

生慚微子獨歸周兩間正氣沉湘骨千載人心競渡舟
欲弔忠魂何處所寒泉一勺奠中流

寄越中社友

浮萍踪跡倦西東愁掛湖湘一席風客鬢瀟疎波影裏
鄉心摇曳櫓聲中清宵有夢迷莊蝶遠地無書託楚鴻
忽憶鏡湖詩酒會飛觴聯句幾人同

送莫同知還吳江

十年前已識韓荆今日相逢眼倍明黑鬢挂冠高世見

滄江對酒故交情
鸞鳳不寄人間跡
鷗鷺還尋物外盟
舉俗好名君好隱
三吳風月更誰爭

宿遠安縣清溪寺

誰信清溪別有天
上方臺殿下方連
紅塵不混金沙地
碧澗長流玉液泉
一榻茶煙浮鬢外
四窓山色落吟邊
年年王事經遊此
肯結三生石上緣

宿寶泉寺

元社丘墟已百年
梵王宮殿景依然
層層古鐵山頭塔

滴滴真珠澗底泉，僧老猶能談往事。予來不是愛逃禪，
填胸俗慮無由遣。借得雲窩一夜眠。

送林允吉少叅督運金州

職在湖藩却入秦，祇緣王事屬王臣。襄鄖有限桃花水，
關隴無窮菜色民。萬斛香杭舟載玉，一團生意律回春。
憑君致語諸民牧，自此邊儲務積陳。

瀟湘秋水

薄宦驅馳厭四方，老懷偏獨戀瀟湘。一江秋色雨新足，

萬頃晴光天共長
回雁峯高清照影
採蘋舟散暗浮香
何當為結臨流屋
汲取寒涓浣熱腸

炎陵古木

炎帝墳陵何處尋
曾憑火夢得荒林
萬年白骨惟塵土
百尺青杉自古今
守護山靈陰有意
往來樵斧寂無侵
神功聖德昭無極
斯邑斯民仰更深

柏溝涵碧

人說崇岡直萬金
環岡左右柏溝深
四時景色相輝映

一派清流自古今
晴愛落花浮水面
晚宜明月到天心
滄洲舊主烏臺客
鷺社鷗盟未許尋

鼓樓迴照

何處青山最可情
鼓樓宜晚亦宜晴
峯銜落日半輪在
葉漏殘陽幾樹明
鴉背分來金閃爍
雁行飛度字縱橫
能詩獨數青蓮裔
好景相望咏不成

牛首晚鐘

牛頭山寺最知名
百尺層樓挂海鯨
嘹唳洪音敲月早

悠揚餘韻出花清
驚回老鶴遊仙夢
引起寒雞唱曉聲
却憶長安候朝處
天風吹珮入端明

寄世昌王先生復用前韻

最愛荆山郢水雄
徜徉山水得相從
久知龍非池中物
暫喜鴻留雪裏蹤
詩就勞公投白壁
乍鳴容我次黃鐘
于今咫尺成胡越
何況天門隔九重

晚翠岡

誰把松杉植滿岡
歲寒時節獨蒼蒼
總無桃李臙脂色

自有冰霜鐵石腸
密葉淡籠秋後翠
清陰長送午前涼
主人舊訂同心約
壁立薇垣老未忘

房陵道中

山外青山關外關
重重天險倦躋攀
十盤峰影浮雲上
八渡泉聲亂石間
草滿畝田燒後黑
苔侵崖樹雨餘斑
架巖多少流居者
獨戀殊風忘却還

遊君山

湖上看山認未真
登山方見翠嶙峋
對城相去無多路

破浪能來有幾人
鏡裏樓臺千古寺
鷗邊花木四時春
興闌又復登舟去
回首煙螺隔世塵

臨湘舟中有懷孔儒太守李承恩進士三昆季
朝離沙羨暮臨湘
萬種新愁七澤長
泛泛世情見逐浪
飄飄身計雁隨陽
沽來竹葉不成醉
採得蘋花空自香
却憶相知阻相見
遡遊宛在水中央

送林允吉陞貴州叅政

昔君遷秩與予同
今日先予戒玉驄
莫厭路經蠻服外

也勝官老蠹書中五愛關民瘼頭先白酒入離腸面不紅
別後功名期益壯免教人棄兩衰翁

宿常德亭驛書壁

辰常四十二長亭數日驅馳已徧經客底風霜雙鬢白
馬前煙雨萬山青有官未許窮幽勝無酒非關效獨醒
行向清沅米蘭芷不知誰解賞芳馨

辰州即事書分司壁

羣山聳秀水流清卧虎奔蛇逸郡城况是車書同盛世

盡令夷獠作編氓花紋土布兼絲織黑石畝田帶火耕
我續輿圖考形勝上游真足控蠻荆

辰溪即事

休輕此邑是遐陬控制西南據上游夾岸峰巒如削玉
傍溪樓閣似聯舟蠻雲結暝長為雨沅芷浮香不斷流
盤瓠遺風無復見衣冠文物等中州

沅州除夜

言停使節宿龍標萬事傷心注酒瓢最苦異鄉為異客

可堪今歲盡今宵官因老至風斯下鬢遇春來雪不消
細向燈前算衰齒一週花甲是明朝

七里喬松

東去沅城七里遙誰栽松樹滿蘭皋冰霜顏色千年古
鐵石枝柯百尺高影落蛟龍宵走月聲驅風雨晝翻濤
我來不作丁生夢那得衰髮換綠毛

八洲芳草

芳草誰言不世情年年偏是滿江汀幾番野火痕方沒

金史四庫全書
卷三百九十一
一夜春風色又青正稱牛羊眠晚照還憐蘭芷雜幽馨
王孫去後無消息千載令人怨獨醒

靖州即事

昨到渠陽駐玉驄王民王土邇遐同山連古寨千峰秀
城枕清河百雉雄天險固宜良將守邊儲還為冗兵空
更憐撼樹蚍蜉命都作凌煙閣上功

詠靖州飛山

不識山從何處飛飛來只恐又飛歸清泉怪石明頭角

野草閒花耀羽衣
四面剛風吹進力
萬年天柱立無依
望中不獨渠陽勝
賸有安邊鎮遠威

和李商隱無題

耿耿幽懷泛泛舟
翠樓時上更夷猶
甘為連理同生死
不逐楊花任去留
千里夢回鷄送曉
萬金書斷雁來秋
相思淚滴西江水
直到東溟東盡頭

墨池春雨

桃花亂落雨冥冥
洗墨池頭春水生
魚口吞雲香不散

鴛羣泛雪影偏明
臨池喜得蘭亭趣
落筆思傳草聖名
惱殺石龍鞭不起
紛紛蛇蚓自縱橫

臨武即事

路入衡南深更深
鷓鴣啼雨晝陰陰
紅香溪澗桃花水
綠蔭人家桂樹林
山勢遙連柳嶺秀
鄉言半帶廣州音
閒過舊日南薰院
一曲虞絃萬古心

題徐明德墨蘭

我愛幽蘭異衆芳
不將顏色媚春陽
西風寒露深林下

任是無人也自香

禱雨通神

滌滌山川厭久晴
甘霖應禱若通靈
神功欲狀渾無跡
題徧東坡喜雨亭

石倉歷代詩選卷三百九十一